

Onur er per sis giuvenils grischuns

Olimpiada da giuvenils a Lillehammer

DA GION NUTEGN STGIER / ANR

■ **Dals 48 giuvenils che represchentan la Svizra tar la segunda ediziun dals gieus olimpics per giuvenils en Norvegia derivan trais mattas e trais mats da noss chantun. Da la partida a Lillehammer èn 1100 atletas ed atlets da 70 naziuns.** L'emprima ediziun dals gieus olimpics da giuvenils ha gi lieu il schaner 2012 en la chapitala tirolaisa Innsbruck. Tar quel event sportiv aveva da la delegaziun svizra cunzunt in atlet gi success e quai è il skiunz *Sandro Simonet* da Casti. Gudagnà aveva el la medaglia dad aur en il slalom, ed il slalom gigant e la super-cumbinaziun aveva el terminà cun gudagnar la medaglia da bronz. Ad Innsbruck aveva diesch mats e 16 mattas da la Svizra cumbatti per medaglias e tranter quel cader er tschintg atlets da noss chantun. Da preschent ha Swiss Olympic selecziunà per ils gieus olimpics da giuvenils a Lillehammer 48 giuvenils e l'onur dad esser da la partida en Norvegia han er trais mattas e trais mats dal Grischun.

Da 14 fin 18 onns

L'occurrenza «Youth Olympic Games 2016» a Lillehammer ha lieu dals 12 fin ils 21 da favrer cun ina participaziun da 1100 sportistas e sportists da 70 naziuns. Sin il program stattan 15 disciplinas per ils giuvenils da 14 fin 18 onns. En 12 lieus vegn cumbatti per aur, argent e bronz. La delegaziun svizra cumpiglia 87 personas ed ils 48 giuvenils che cumbattan per medaglias

derivan da 21 chantuns. Cun 14 onns è *Philipp Hösli*, il giugader da curling da Glaruna, il pli giuven atlet svizzer. L'anteriura skiunza *Dominique Gisin* e l'anteriur patinader *Stépane Lambiel* vegnan a sustegnair la delegaziun svizra cun buns cussegls.

Far experientscha sin champ internaziunal

Las occurrenzas da sport èn bain l'aspect central tar ils gieus olimpics da giuvenils

en la Norvegia, dentant èn quels er qua per far experientscha sin champ internaziunal. Las sportistas ed ils sportists han er occasiun da sa participar a divers uschenumnads «workshops» tar ils temas respect, valurs, prestaziun ed amicizia. Experientscha dastgan lura er far ils atlets e las atletas da noss chantun tar quel grond event da sport a Lillehammer. Quai èn: il biatlet *Nico Salutt* da Zernez, las duas passlunghistas *Desirée Steiner* da

Tavau e *Giuliana Werro* da Zernez, il passlunghist *Maurus Lozza* da Zuoz, la skiunza da cross *Talina Gantenbein* da Tavau e lura il bobist *Marius Schneider* da Jenins. Tar ils gieus olimpics 1994 a Lillehammer aveva la Svizra fatg trais medaglias dad aur, quatter d'argent e duas da bronz. Quai è bain ina buna motivaziun er per noss giuvenils che partan en trais emnas en direcziun Europa dal nord.



Nico Salutt, il biatlet da Zernez, è er da la partida a Lillehammer tar ils gieus olimpics da giuvenils 2016.